

Dr J. FALLEN

Lou ceramista Louis Sicard

MEIDAMO, MESSIÉS,

Mi veici mai, sus l'envitacien eimablo de voueste burèu, pèr vous parla d'Aubagno e de seis Aubagnen: finirés bèn coumo acò pèr l'aplica la fourmulo autre-tèms coumuno à plusiour vilo de Prouvènço: *Pichouno vilo, grand renoum!*

Es fouero de countèsto d'aiours, Meidamo e Messiés, que lou noum soulet d'Aubagno, quand n'es questien pèr vouésteis escourregudo galoio, fa nèisse dins vouesto imaginacien fegoundo tout un mounde fantastique de santoun, de jarro, de jarreto, d'oulo, de toupin — que cadun, coumo dins lou prouvèrbi, trovo sa curbecello, — de tian, de troumpeto de Sant-Jan, de pot pèr nouéstei frèso einbaumado, de vaso pèr nouéstei flour redoulènto e de... lagrematòri; aquélei qu'an l'amo un brisoun mai pouëtico sonjon encaro ei cigalo cantarello que nèisson l'estiéu sus lei pendis souleious de Garlaban e quàuquei fes meme ei tambourinaire dóu large capèu qu'imiton, emé tant de gàubi sus soun fluitet, la revertigueto musico cigaliero.

Es vrai: en mai de sei cigalo e de sei tambourin, Aubagno, aquelo poulido viloto que coumo un limbert pren lou cagnard au pèd de Garlaban, sus lei bord de l'Uvèuno flourido e parfumado, Aubagno tiro un renoum famous e merita de sei terraio e terraieto de touto meno que, despuei dès siècle, li fabricon sels abèlei tournejaire; es vrai meme qu 'uno deis eisino dei mai utilo, dei mai indispensablo que si li fan a lou poudé de faire rire, quand si n'en parlo, e rire meme à n'en... ploura, pèr pau que si n'en fague la mendro coumparitudo, an regard musicau, emé la troumpeto de Sant-Jan; es vrai encaro que soun endustriò terraiero, à l'esprit dóu mounde que n'en counouis mau e l'istòri e l'estè, clarejo pas d'uno lus esbrihaudanto dins la tiero dei mestié d'art: mai aqui l'a 'no injustici e vouéli vous la prouva.

Devini ço qu'anas mi dire: siéu d'Aubagno, qu'es tambèn lou païs dei jardinié, car emé nouéstei fabrico avèn aussi noueste superbe e verdejant Bèudina mounte s'amaduron lei chichourlo; siéu d'Aubagno e m'anas dire que chasque jardinié vanto sei pouèrri.

Acò 's vrai, se voulès, coumo prouvèrbi, mai sera pas vrai aquesto fes, d'abord que vous parlarai pas de l'ourtoulaio fresco e goustouso de nouéstei jardin e que, de pouèrri, n'en sera dounc pas questien.

Mai se vous vanti la poutarié artistico d'Aubagno, aurai au mens la memo resoun que lou jardinié que vanto soun liéume: es que la counouissi.

*

* *